



## UGOVOR O AKADEMSKOJ, NAUČNOJ I POSLOVNO-TEHNIČKOJ SARADNJI

zaključen dana 10.05. 2017. godine,  
između

1. **Visokoškolske ustanove Evropski univerzitet „Kallos“ Tuzla**, sa sjedištem u Tuzli, u ul. Maršala Tita broj 2A i 2B, čiji je zastupnik v.d. rektor prof. dr. Nedeljko Stanković, s jedne strane (u daljem tekstu: Univerzitet)
- i
2. **Javne zdravstvene ustanove Univerzitetski klinički centar Tuzla**, sa sjedištem Tuzli, u ul. Trnovac bb, čiji je zastupnik direktor Doc.dr.med.sci. Nešad Hotić, s druge strane (u daljem tekstu: Centar).

### Član 1.

Ugovor je zaključen s ciljem međusobne saradnje dvije ustanove u budućem procesu obrazovanja, naučno-istraživačkog rada i drugih poslova u okviru registrovane djelatnosti.

### Član 2.

Ugovorne strane će nastojati da razvijaju međusobne veze prema principima zajedničke koristi, opšteg društvenog interesa, te zajedničke komplementarne djelatnosti visokog obrazovanja.

Ugovorne strane će uložiti najveće i iskrene napore da se ovaj ugovor realizuje na akademskom nivou.

### Član 3.

Ciljevi saradnje:

1. razvoj i podsticanje zajedničkih istraživanja, seminara, međunarodnih konferencija, uz napore da se obezbijede eksterni izvori finansiranja;
2. razvoj razmjene znanja i naučnih informacija kroz recipročnu razmjenu naučnih i stručnih publikacija, e-publikacija, akademskog materijala, stručnih izvora i drugih resursa;
3. ohrabrivanje i drugih akademskih projekata i aktivnosti upućenih prema drugim akademskim partnerima i ostalim izvorima finansiranja neprofitnih i akademskih projekata i
4. podsticanje i drugih akademskih aktivnosti za koje se obje ugovorne strane slože da su od zajedničkog interesa i koristi.

#### **Član 4.**

Područje saradnje će uključivati bilo koje akademske i druge naučne odnose, stručne programe koji su akreditovani i registrovani u bilo kojoj od ustanova u cilju razvoja zajedničkih aktivnosti u nastavnim i akademskim oblastima koje su od obostranog interesa, na čemu su osigurali kvalitetu i reciprocitetu.

Ugovorne strane će podnositi prijedloge vezane za zajedničke projekte prema odredbama ovog ugovora putem rukovodećeg izvršnog osoblja ili putem nadležnog akademskog osoblja.

Univerzitet je odgovoran za akreditaciju fakulteta u zemlji i inostranstvu. Centar može pomagati u tom procesu, ali odgovornost je isključivo na Univerzitetu.

#### **Član 5.**

Ugovorne strane obostrano izjavljuju da će Centar omogućiti obavljanje stručne prakse:

1. za studente Fakulteta zdravstvenih nauka Univerziteta na studijskim programima:
  - Sestrinstvo;
  - Fizioterapija i radna terapija;
  - Farmacija;
  - Sanitarni inženjering i
  - Radiologija.
2. za studente Medicinskog fakulteta Univerziteta na studijskim programima:
  - Medicina i
  - Biomedicina i zdravstvo.
3. za studente Tehničkog fakulteta Univerziteta na studijskom programu Inženjerska informatika.

#### **Član 6.**

Stručna praksa studenata u Centru obavljat će se po utvrđenom nastavnom planu i programu na I, II i III ciklusu studija Fakulteta zdravstvenih nauka i Medicinskog fakulteta Univerziteta na klinikama, poliklinikama, zavodima i bolničkoj apoteci Centra, a za studente Tehničkog fakulteta Univerziteta u Sektoru za informacione tehnologije Centra.

#### **Član 7.**

Univerzitet će prije početka nastave, u skladu sa nastavnim planom i programom za svaku akademsku godinu specificirati potrebe prema broju studenata za obavljanje stručne prakse i dostaviti Centru spiskove studenata.

Centar će studentima Univerziteta obezbijediti kvalitetno i bezbjedno izvođenje stručne prakse, u skladu sa raspoloživim materijalnim, prostornim i kadrovskim resursima, uz primjenu i provođenje mjera zaštite na radu i zaštite od požara prema važećim propisima.

#### **Član 8.**

Univerzitet je obavezan osigurati da svi studenti prije obavljanja stručne prakse izvrše obaveznu sanitarnu obradu i dostaviti o tome dokaz Centru (sanitarna knjižica), te da imaju čistu uniformu i čistu obuću za vrijeme obavljanja stručne prakse u Centru.

Sanitarna obrada i posjedovanje uniformi nisu obavezni za studente Tehničkog fakulteta.

Centar će studente Univerziteta blagovremeno, na primjeren način, upoznati sa propisanim kućnim redom.

#### **Član 9.**

Ukoliko je nastavnim planom i programom predviđeno da studenti dio stručne prakse obavljaju u zoni jonizirajućeg zračenja, Univerzitet je obavezan osigurati da svi studenti obave prihodni zdravstveni pregled, saglasno Pravilniku o zdravstvenom nadzoru lica profesionalno izloženih jonizirajućem zračenju („Službeni glasnik Bosne i Hercegovine”, broj 68/15).

#### **Član 10.**

Mentora stručne prakse određuje Centar, pri čemu će, po mogućnosti, prednost dati zaposlenicima Centra koji su angažovani na Univerzitetu.

#### **Član 11.**

Univerzitet se obavezuje da obezbijedi da se studenti za vrijeme obavljanja stručne prakse ponašaju u skladu sa visokim etičkim i moralnim standardima, kao i da se prema opremi Centra ponašaju sa pažnjom dobrog domaćina.

Univerzitet je odgovoran za svaku štetu koju njegovi studenti pričine Centru u toku obavljanja stručne prakse u prostorijama Centra.

Univerzitet je također obavezan osigurati studente za slučaj eventualne povrede u toku obavljanja stručne prakse u prostorijama Centra.

#### **Član 12.**

Ugovorne strane su se sporazumjele da će Univerzitet Centru, na ime korištenja opreme, sredstava za rad, potrošnog materijala kao i ostalih materijala neophodnih za kvalitetno obavljanje stručne prakse, plaćati naknadu u iznosu od 200,00 KM + PDV po studentu za stručnu praksu u trajanju od 30 dana, odnosno 100,00 KM + PDV po studentu za stručnu praksu u trajanju od 15 dana.

Naknada iz stava 1. ovog člana Univerzitet će plaćati prije početka obavljanja prakse, a na osnovu fakture koju će Centar ispostaviti prema spisku studenata dostavljenom od strane Univerziteta u skladu sa članom 7. stav 1. ovog Ugovora.

#### **Član 13.**

Ovaj Ugovor se zaključuje na neodređeno vrijeme, s tim da Centar zadržava pravo da prije početka svake akademske godine zahtjeva korekciju visine naknada iz člana 12. stav 1. ovog Ugovora ukoliko dođe do objektivnog povećanja troškova Centra u vezi sa obavljanjem stručne prakse, te da otkáže Ugovor ukoliko Univerzitet ne uvaži takav zahtjev.

Ugovorne strane će stvarati uslove da se ovaj Ugovor održi na snazi najmanje dok traje obilježavanje školovanja jedne generacije studenata – 6 godina i neće ga otkazivati u tom roku, ukoliko druga strana ispunjava sve svoje obaveze.

U toku važenja Ugovora svaka ugovorna strana ima pravo isti otkazati ukoliko druga ugovorna strana ne ispunjava svoje ugovorne obaveze, ili ukoliko nastupe druge okolnosti zbog kojih bi bilo opravdano otkazati Ugovor, uz obavezu da o namjeri otkazivanja prethodno putem obavijesti drugu ugovornu stranu najkasnije 30 dana prije dana s kojim nastupa otkazati Ugovor.

Ugovorna strana koja je pretrpjela štetu zbog neispunjenja obaveze druge ugovorne strane ima pravo na naknadu štete.

#### Član 14.

Ovaj Ugovor nije, niti se može smatrati, ugovorom iz člana 22. stav 1. Pravilnika o uvjetima koje moraju ispunjavati bolnice za dodjelu naziva univerzitetska bolnica („Službene novine Federacije Bosne i Hercegovine“, broj 85/12), a u vezi sa članom 104. Zakona o zdravstvenoj zaštiti („Službene novine Federacije Bosne i Hercegovine“, broj 46/10 i 75/13).

#### Član 15.

Ovaj Ugovor je zaključen u četiri (4) istovjetna primjerka, od kojih svaka ugovorna strana zadržava po dva (2) primjerka.

#### Član 16.

Ugovorne strane će eventualne sporove rješavati sporazumno, a ukoliko to ne bude moguće, za rješavanje takvih sporova biće nadležan Općinski sud u Tuzli.

#### Član 17.

Ovaj Ugovor stupa na pravnu snagu danom obostranog potpisivanja.

S stupanjem na pravnu snagu ovog Ugovora, prestaje da važi Ugovor o akademskoj, naučnoj i poslovno-tehničkoj saradnji zaključen između istih ugovornih strana, koji je kod Centra za zdravstvo pod brojem: 1-303/16 od 15.11.2016. godine, a kod Univerziteta pod brojem: 924-4/16 od 18.11.2016. godine.



Za Univerzitet  
Prof. dr. Nedeljko Stanković

Broj: 23-1/2017  
Tuzla, 10.05.2017. godine



Za Centar  
DIREKTOR  
Doc.dr.med.sci. Nešad Hotić

Broj: 1-169/17  
Tuzla, 10.05.2017. godine